



EDITORIAL

Naghahakin han pondo hi Duterte agud pahilawigon an iya tiraniko nga paghahadi

Magkalain-lain nga pamaagi an ginhihimo yana ni Rodrigo Duterte agud makaghakin han pampubliko nga pondo komo pangandam para ha eleksyon ha 2022. Plano niya nga gamiton an hiluagan nga panhukip ngan kamadarahug agud magpabilin ha poder komo bise-presidente. Pagagawson nga gin-endorso la hiya han naghahadi nga paksyon nga kontrolado liwat niya.

Nahahadlok hi Duterte nga mapatalsik ha atubangan han grabe nga kangalas han katawhan ha iya tiraniko nga paghahadi. Karuyag han katawhan nga sirutan hiya tungod ha iya pagpapakuri ngan panmuypoy. Kundi maram hiya nga kun butaray hiya nga magdeklara han diktadura, poyde nga diri hiya hul-os nga suportahan han militar. Ginsusukna hiya han maka-US nga elemento ha AFP tungod ha iya pagyukbo ha China, sanglit ginpili na la niya nga sumakob ha eleksyon. Agud seguruhon an iya pagdaug, gagamiton niya nga surok han pangastos an

pondo han katawhan.

Padayon hiya nga nagpapakaniyutiyo ha imperyalismo nga US. Karuyag niya han “mas mahamis” nga Visiting Forces Agreement, nga ha iba nga pulong mas dako nga ayuda militar ngan mas damo nga armas para gamiton ha kampanya kontra-insurhensiya ngan ha iya todo-gerra kontra ha ngatanan nga oposisyon. Ginlalauman an mas agsub nga insidente han kamadarahug samtang tikaapiki na an eleksyon.

Dirudiretso an pagpahayag han hunta-militar ni Duterte ha National Task Force to End Local Communist Armed Conflict (NTF-ELCAC) nga damo na an “nagsusurender” ngan “cleared” nga barangay. Tuyo hini nga seguruhon an bilyun-bilyon nga pondo ilarum han Barangay Development Program, nga gagamiton agud baydan an mga militarista nga lokal nga upisyal ngan mga magapil ha paksyon nga maka-Duterte. Surok liwat han pondo para ha eleksyon an mga daan nga programa kontra-insurhensiya nga E-CLIP ngan PAMANA.

Balaud agud pakusgon an paghahadi militar, ginproponer

NAGPAHIMATNGON AN National Democratic Front-Eastern Visayas kontra ha ginproponer nga balaud ha Kongreso nga nagtutumuyo nga igpadayon an paghahadi militar lahos ha termino ni Rodrigo Duterte pinaagi han pagsabalaud han “whole-of-nation approach” (bug-os nga nasud nga daup). Ginsalawad an nasering nga proposisyon han representante han Southern Leyte nga hi Roger Mercado.

Ha usa nga pahayag, ginsering han NDF-EV nga pinaagi hini nga pitad, maseseguro an padayon nga militarista nga paghahadi han paksyon nga maka-Duterte. Seseguruhon hini nga magdirudiretso an ira kahakog ngan kurapsyon.

Dugang nga igpapailarum ha poder han militar an sibilyan nga guberno tikang ha balitang han rehiyon tubtub ha mga barangay. Talapas ini bisan ha batakan balaud han reaksyunaryo nga guberno nga nananalipod han pag-ungbaw han sibilyan nga poder ha militar.

Dugang han NDF-EV, bisan kun waray pa ini igsabalaud, ura-ura na an poder ha guberno ni Duterte ngan han iya mga paborito nga heneral nga hira Delfin Lorenzana, Hermogenes Esperon ngan Eduardo Año. Hira nga tulo an namumuno ha NTF-ELCAC ngan nangunguna ha panmirit ha mga lokal nga upisyal ngan ordinario nga sibilyan nga pumartisipar ha kampanya kontra-insurhensiya. “Kun dumiri hira, gintatahapan hira han militar nga natalapas ha Anti-Terror Law,” sering han NDF-EV.

Sigon ha NDF-EV, tikang pa had-

Nanmumurot han numero ha kahanginan hi Esperon

Ginbuksas han Partido Komunista ng Pilipinas (PKP) an buwa ni Gen. Hermogenes Esperon han National Task Force to End Local Communist Armed Conflict (NTF-ELCAC) nga 17,958 katawo na an nagsurender ha reaksyunaryo nga gubyrno tikang hadton 2016. Mayda pa kuno 2,220 nga barangay nga “cleared” na o malimpyo na han Bagong Hukbong Bayan (BHB). Kaparte ini han pagseguro ni Esperon han bilyun-bilyon nga pondo tikang ha mga maanomaliya nga programa kontra-insurhensiya han militar ngan NTF-ELCAC.

Ha gin-aalegar ni Esperon nga mga “sumurender,” 3,684 kuno an “regular nga kaapi han BHB,” samtang an iba mga kaapi han organisasyon masa ngan yunit milisya. Kundi tikang pa hadton 2017 ginyiyinawyaw han AFP nga mayda nala 3,700 nga mangaraway an BHB. Magawas nga 16 na la an membro han BHB ha presente, sigon ha PKP. Maaram bisan an publiko nga dako nga buwa ini.

Dugang nga nakakagupong an mga numero ni Esperon han maganunso hiya hadin Lunes nga 4,000 na la an mga Pula nga mangaraway. Subay naman hini, kada tuig tikang 2017 nakagdugang an BHB han 1,000 nga kaapi. Sukwahi ini ha pauru-utro nga buwa ni Esperon ngan han AFP nga “natikaluya” ngan “natikaluros” na an BHB. Sering pa han PKP, “Tiu-nan-o nga samtang natikadamo an ‘barangay nga cleared’ [han BHB] natikahitaas an kaapihan [hini]?”

Ha kamatuoran, naglalanat an NTF-ELCAC nga makagbursa han pondo tikang ha Barangay Development Program (BDP) ngan E-CLIP yana nga natikahirani na an deliberasyon para ha nasyunal nga badyet para ha 2022. Pinaagi han BDP, poyde makatinnan ni Esperon an maabot ha P44 kabilyon (P20 kamilyon kada barangay nga “cleared”) agud gamiton ha eleksyon han mag-amay ngan tandem ha pagkandidatura nga hira Sara ngan Rodrigo Duterte. Padayon naman nga nagseserbe an E-CLIP ko-

mo surok han kurapsyon han militar, kun diin bugas ngan delata la an nakarawat han pira nga “surenderi” imbes an ginsaad nga P65,000.

“Buwa ini nga mga numero nga ginrereport han NTF-ELCAC ngan AFP,” sigon ha PKP. Ungod nga mayda mga mangaraway han BHB nga sumurender o umiskapo, pero diri ini urusahan ha dalagan han gerra. Kundi, dako nga mayoriya han mga “surenderi” mga parag-uma nga ginpwera han militar nga “makigkoopear” kahuman han mga kaso han panmatay, panhugay, panharas, pan-gigipit ngan panarhug.

Ha pagkita ni Propesor Jose Maria Sison, tagapangulo nga tagapagtukod han PKP, ini nga kamadarahug han militar, pansaywar, pagbinuwa, ngan kurapsyon han mga upisyal han AFP nagresulta ha natikagrabe nga paniniyupi ngan pananalumpigos ha katawhan. Amo ini an rason han pagkusog han Partido, BHB, ngan mga rebolusyunaryo nga pwera ha masobra 110 nga prente gerilya.

An gin-aalegar nga 4,000 nga kaapi han BHB dako nga pagmenos ha ungod nga ihap han mga Pula nga mangaraway, dugang ni Prop. Sison. Ginsusuportahan pa hira han milyun-milyon katawo ha mga panmasa nga organisasyon. Nakakagpreserbar liwat han kalugaringon an BHB pinaagi han pagsarig ha masa ngan paggamit han superyor nga ginerilya nga taktika. ■

paghahadi. Diri na angay ilubon han katawhan an iya waray katapusan nga kurapsyon, pasismo, ngan pagtraydor. Sanglit, kinahanglan nira himuon an ngatanan nga porma han pakig-away agud mapaiwas na hiya ha pinakadagmit nga panahon. ■

“Balaud..,” tikang ha paypay 1

ton 2019, nakarawat na ini han mga reklamo tikang ha mga lokal nga upisyal nga ginpipirit han militar nga magdeklara han “persona non grata” kontra ha rebolusyunaryo nga kagiusan.

Nananawagan an NDF-EV ha katawhan nga atuhan ini nga proposisyon, padayon nga ig-insister nga bungkagon an NTF-ELCAC ngan idireher an P19 kabilyon nga pondo hini ngadto ha pagbakuna ngan paghatag hin ayuda ha mga kablás. ■

Petisyon para ha P100 nga emergency wage relief, iginbasura

GINBASURA HAN Regional Tripartite Wages and Productivity Board (RTWPB) hadin Mayo 4 an P100 *emergency wage relief* nga ginproponer han Unyon han mga Manggagawa ha Agrikultura (UMA) ngan Anakpawis Partylist. Kadungan hini nga proposisyon an P10,000 nga ayuda para ha mga nga nawarayan hin trabaho ngan pag-isa han minimum nga suhol ngadto ha P750 kada adlaw. Duha kabes na nga ginbasura ini nga petisyon han RTWPB nga una na nga ginsalawad hadton Abril 15 han Defend Jobs Philippines.

Ha presente, maabot ha 12 kamilyon an waray o kulang an trabaho. An mayda trabaho, nag-aantos ha ura-ura kahimubo nga suhol. Bumagsak ha 30% an kita han mga kablás. Sanglit, damo yana an nabubuhi ha P90 la kada adlaw. Himubo ini ra-ura labina ha panahon nga natikahitaas an presyo han mga paplitan ngan waray sandang nga ayuda para ha ngatanan.

Ha luyo nga bahin, dugang la nga natikahitaas an kita han mga dagko nga negosyante. Grabe an paghakin nira han kita samtang naghihimakuri an mga trabahador ha diri makaburuhi nga suhol ngan pagbalewaray han RTWPB ha ira makatadungan nga petisyon. ■

“Naghahakin..,” tikang ha paypay 1

Todo nga paaandaron ni Duterte an iya burukrata-kapitalista nga makinarya agud seguruhon an iya kadaugan ha eleksyon. Kinahanglan ibuksas ngan pursigido nga atuhan han katawhan an ngatanan nga pag-atenatar ni Duterte nga pahilawigon an iya